

O Consello para a convivencia escolar da Comunidade Autónoma de Galicia

Que é?

O Consello para a Convivencia Escolar da Comunidade Autónoma de Galicia créase como órgano de carácter consultivo e de apoio a toda a comunidade educativa no que se refire a convivencia escolar, está regulado no artigo 10 do Decreto 8/2015.

Estará adscrito á Consellería con competencias en materia de educación e contará co apoio dos servizos técnicos da administración educativa, para fomentar a participación dos membros da comunidade educativa na mellora da convivencia.

Como funciona?

O réxime de funcionamento do Consello para a Convivencia Escolar será o establecido para os órganos colexiados na Lei 16/2010, así como o previsto no citado artigo 10.2 do Decreto 8/2015, na normativa que o desenvolva e, de ser o caso, nas súas propias normas de funcionamento.

En todo caso, axustarase ao seguinte:

- O Consello para a Convivencia Escolar funcionará en Pleno e en Comisión permanente, podéndose acordar, ademais, a creación das comisións técnicas de traballo que se consideren oportunas.
- O Pleno manterá, con carácter ordinario, unha reunión anual e con carácter extraordinario as reunións que se consideren oportunas, por iniciativa propia ou por iniciativa dunha terceira parte dos seus membros.
- A Comisión permanente estará integrada por cinco membros do Pleno, elixidos por este. Poderá estar asistida polo persoal técnico dos sectores implicados para realizar aquelas tarefas que o Consello para a Convivencia Escolar lle encomende. Estará presidida pola persoa responsable da Consellería con competencias en materia de educación ou pola persoa do Pleno en quen delegue.

Cal é a súa composición?

O Consello para a Convivencia Escolar da Comunidade Autónoma de Galicia, en Pleno, estará constituído, tal como se recolle no artigo 10.3, polos seguintes membros:

- A persoa titular da consellería con competencias en materia de educación, que exercerá a Presidencia.
- A persoa titular da dirección xeral con competencias en materia de convivencia, que exercerá a Vicepresidencia.
- As persoas titulares das restantes direccións xerais e secretarías xerais da consellería con competencias en materia de educación vinculadas á dita área, ou as persoas en quen deleguen.
- A persoa titular da secretaría xeral técnica da consellería con competencias en materia de educación, ou a persoa en quen delegue.
- A persoa responsable da xefatura territorial da consellería con competencias en materia de educación de cada provincia, ou a persoa en quen delegue.
- Catro persoas con rango de director ou directora xeral ou secretario ou secretaria xeral, representantes das consellerías competentes en materia de xustiza, sanidade, benestar e igualdade, ou as persoas en quen deleguen.
- Unha persoa representante do Consello Escolar de Galicia.
- Unha persoa representante da Federación Galega de Municipios e Provincias.
- Unha persoa representante da Xunta Autonómica de Directores de centros educativos.
- Dúas persoas representantes das confederacións de asociacións de pais e nais, unha delas de centros educativos públicos e outra dos centros educativos privados concertados.
- Unha persoa representante das confederacións de asociacións de alumnado.
- Unha persoa representante por cada organización sindical con representación na mesa sectorial docente.
- Unha persoa representante da patronal dos centros de ensino privados concertados.
- Dúas persoas de recoñecido prestixio no ámbito da convivencia escolar.
- Unha persoa funcionaria da consellería con competencias en materia de educación, designada pola dirección xeral con competencia en materia de convivencia, que actuará como a secretaria ou o secretario, con voz e sen voto.

En todo caso, a súa composición integrará o principio de igualdade entre mulleres e homes.

NOTA: A súa [composición actual](#) está regulada na Orde do 16 de abril de 2015, pola que se nomean os membros do Consello para a Convivencia Escolar da Comunidade Autónoma de Galicia (DOG 22/4/2015)

Cales son as súas funcións?

As funcións do Consello para a Convivencia Escolar da Comunidade Autónoma de Galicia veñen recollidas no artigo 10.5 e serán ás seguintes:

- Avaliar a situación da convivencia nos centros, establecendo estratexias para a recollida de información, análise e difusión dos datos, e impulsando a investigación neste ámbito.
- Analizar e propoñer liñas de actuación de investigación, prevención e inclusión en materia da mellora da convivencia escolar.
- Propoñer iniciativas de cara á mellora do clima escolar, elevando propostas de actuación á Administración educativa e realizando o seguimento e a avaliación destas iniciativas.
- Propoñer liñas de actuación en materia de formación do profesorado no que respecta á convivencia escolar, promover a elaboración de materiais e recursos e facilitar o intercambio de experiencias.
- Colaborar no desenvolvemento de programas preventivos e para a detección precoz de situacións conflitivas nos centros educativos.
- Colaborar con diferentes organismos e entidades que teñan entre os seus fins a prevención e resolución de conflitos, así como a potenciación e mellora da convivencia escolar.
- Coordinar as súas actuacións cos distintos servizos e organismos que teñen responsabilidades, competencias e implicación en materia de convivencia e canalizar, de ser o caso, ás instancias competentes os temas obxecto de consulta ou asesoramento que lle correspondan.
- Elaborar ao final de cada curso escolar unha memoria anual na que se recolla a situación da convivencia nos centros docentes non universitarios sostidos con fondos públicos da Comunidade Autónoma de Galicia.
- Realizar cantas outras funcións lle sexan encomendadas pola consellería con competencias en materia de educación para a mellora da convivencia escolar.

No cumprimento das funcións anteriores deberá terse en conta, nos casos que sexa procedente, a perspectiva de xénero, que será especificamente valorada nos informes, avaliacións, iniciativas e propostas de liñas de actuación para previr e tratar a violencia por razón de sexo.

Ademáis nos puntos seguintes do citado artigo 10 se recollen as funcións máis específicas referidas aos seus membros: presidencia (art. 10.6), vicepresidencia (art. 10.7), secretaría (art. 10.9) e os membros (art. 10.8).

Como e por canto tempo se nomean os seus integrantes?

O nomeamento das persoas integrantes do Consello para a Convivencia Escolar será competencia da persoa titular da consellería con competencias en materia de educación, por proposta das organizacións, dos órganos, dos centros e das institucións ás que pertencen os seus membros, por un período de dous anos a partir da data da súa publicación no Diario Oficial de Galicia, e renovable por dous máis.

No suposto de que un dos membros perdesa a súa representatividade será designada unha persoa substituta conforme ao sinalado neste apartado, e polo tempo que lle reste no exercicio do cargo ao anterior, tal como se indica no artigo 10.10 do Decreto 8/2015.

Como se xestiona?

A consellería con competencias en materia de educación atenderá con cargo á súa consignación orzamentaria os custos de constitución e funcionamento do Consello para a Convivencia Escolar da Comunidade Autónoma de Galicia, e creará un espazo específico para este órgano consultivo no portal educativo, que será canle de comunicación entre os distintos organismos que participen na mellora da convivencia nos centros educativos, así como de información e difusión dos estudos, das investigacións e dos materiais que se elaboren ao respecto.